

ЛОЙИҲА
(махфий)

“АБС” АЖ Одоб-ахлоқ қоидаларига
амалий илова сифатида тавсия этилади

“АБС” АЖ

ХОДИМЛАРИ УЧУН КУНДАЛИК ИШ МУҲИТИДАГИ ХУЛҚ-АТВОР ЙЎРИҚНОМАСИ

“АБС” АЖнинг 202X-йил 2-сентябрдаги №xx сонли буйруғи билан тасдиқланган Одоб-ахлоқ қоидалари ходимлар учун умумий ахлоқий тамойилларни жумладан ҳалоллик, адолат, манфаатлар тўқнашувининг олдини олиш, коррупцияга қарши хулқ-атвор ва бошқа барқарор қадриятларни белгилайди. Бу тамойиллар узок муддатга мўлжалланган бўлиб, компания фаолиятининг асосини ташкил этади.

Шу билан бирга, кундалик иш жараёнида ходимлар муттасил дуч келадиган аниқ вазиятлар хусусан ҳамкасблар билан саломлашиш, мижоз ва меҳмонларни кутиб олиш, йиғилишларда ўзини тутиш, суҳбат маданияти, электрон хат-хабар алмашиш, катта-кичиклик муносабатлари, совғалар, очиқ офисда ишлаш ва ошхона муҳитида ўзини тутиш, ваъда ва муддатларга риоя қилиш умумий қоидаларда батафсил очиб берилмаган. Турли тажриба, маданий фон ва қарашларга эга ходимларда мана шундай вазиятларда бир хил, аниқ кутилмалар шаклланиши учун мазкур амалий йўриқнома ишлаб чиқилди.

Йўриқнома Одоб-ахлоқ қоидаларининг асосий тамойилларини конкретлаштиради ва тўлдиради, лекин уларнинг ўрнини босмайди. Йўриқномани тавсиявий характерда фойдаланиш лозим. Йўриқнома билан Қоидалар ўртасида зиддият юзага келган тақдирда, Одоб-ахлоқ қоидаларининг моддалари устунлик қилади.

1. УМУМИЙ ҚОИДАЛАР

- Мазкур Йўриқнома “АБС” АЖнинг барча ходимларига, шу жумладан меҳнат шартномаси ёки фуқаролик-ҳуқуқий шартнома асосида ишлайдиган шахсларга нисбатан қўлланилади.
- Йўриқнома компания биносида, масофадан туриб ишлаш чоғида, шунингдек мижозлар ва ҳамкорлар билан расмий учрашувларда амал қилади.
- Йўриқномага риоя қилиш ходимнинг хизмат фаолияти ва ахлоқини баҳолашда инobatга олинади.
- Йўриқномада акс этмаган вазиятларда ходимлар Одob-ахлоқ қоидаларининг умумий тамойилларидан (ҳурмат, адолат, бағрикенглик) келиб чиқиб ҳаракат қилади.

2. САЛОМЛАШИШ ОДОБИ

- Ишга келганда ва ишдан кетаётганда ҳамкасблар билан овоз чиқариб саломлашиш тавсия этилади; фақат бош ирғаш ёки имo-ишора билан чекланиш тавсия этилмайди.
- Лавозимидан қатъи назар, ким аввал учратса ёки хонага кейин кирса, шу салом беради; жавоб саломи ҳеч истисносиз қайтарилади.
- Сухбат ёки муҳим иш билан банд бўлган ҳамкасбни кескин тўхтатиб саломлашиш ёки қўл бериш тавсия этилмайди. Бунинг учун мос бўлган фурсат кутилади.
- Мижоз ёки меҳмон келганда тик турилади, табассум билан кутиб олинади, исм-шарифи ва ташриф мақсади аниқланади.
- Телефон орқали сухбат ҳам саломлашишдан бошланади ва ўзини таништириш билан давом этади.
- Қўл бериб саломлашишда сухбатдошнинг ҳолати (масалан, қўли банд, шошилаётган ёки бошқа ишга жиддий берилган бўлиши) ҳисобга олинади. Бундай ҳолатда оғзаки салом етарли ҳисобланади. Қўл бериб кўришиш ҳар икки томоннинг ўзарo розилиги ва қулайлигига боғлиқ ихтиёрий амал ҳисобланади; бирор ходим буни истамаса, фақат оғзаки салом билан чекланиши унинг ҳурматсизлиги деб баҳоланмайди.
- Банд хонада ёки кабинетда бўлган раҳбар ёхуд ҳамкасбнинг ёпиқ хонасига киришдан олдин эшикни таққиллатиб, рухсат олиш лoзим; рухсатсиз кириб бoриш одobсизлик ҳисобланади.
- Бир нечта ходим бирга бошқа ходим ёки бўлимга кириб саломлашганда, улардан биттаси номидан саломлашиш бутун гуруҳ учун етарли ҳисобланади; худди шундай, жавоб саломи ҳам гуруҳдан биттаси томонидан берилса, бутун гуруҳ учун кифоя қилади.
- Катта ёшли ходимга салом беришда овоз баландлиги меъёрида, ҳурматли оҳангда бўлиши керак; овозни кераксиз кўтариш ёки кеккайган оҳангда гапириш тавсия этилмайди.
- Йўлакда ёки коридорда шошилиб кетаётган ҳамкасбни қўл бериб кўришиш учун тўхтатиш тавсия этилмайди. У муҳим ишга кетаётган бўлиши мумкин; бундай ҳолатда оғзаки салом билан чекланиш кифоя.
- Қўл бериб саломлашиш одати фақат учрашув бошида эмас, хайрлашаётганда ҳам давом этадиган амал ҳисобланади.

- Ходим бошқа бўлим ёки ҳамкасбга биринчи марта мурожаат қилганда, ўзининг исм-шарифи, бўлими ва лавозимини ва мурожаат мақсадини қисқача тақдим этиши тавсия этилади. Бу суҳбатдошга вақт тежайди ва мурожаатни тезроқ тушунишга ёрдам беради.
- Телефон қўнғироғига жавоб берилганда ёки қўнғироқ қилинганда, ходим ўз исм-шарифи ёки бўлимини таништиради. Бу суҳбатдошга ким билан гаплашаётганини дарров аниқлашга ёрдам беради.
- Ҳамкасб бошқа бирор кишининг (нафақат мижоз ёки меҳмоннинг) иш столига ёки кабинетига кирганда, ўтирган ҳолатда қолиб кетмасдан, тик туриши ёки ўрнини бироз ўзгартириши ҳурмат белгиси ҳисобланади.

3. МЕҲМОН ВА МИЖОЗЛАРНИ КУТИБ ОЛИШ-КУЗАТИШ ОДОБИ

- Мижоз ёки меҳмон ташриф буюрганда унинг исми ва ташриф мақсади аниқланади; бу икки томон учун ҳам ноқулайликнинг олдини олади.
- Меҳмонга ортиқча эътибор қаратиб, уни доимий назар билан кузатиш ёки ишидан чалғитиш тавсия этилмайди. Унга эркин ва қулай муҳит яратилади.
- Меҳмоннинг эҳтиёжлари (сув, ўтириш жойи ва бошқалар) ташриф бошида, у сўрамасдан туриб таклиф этилади.
- Бир вақтнинг ўзида бир нечта меҳмон қабул қилинганда, уларга нисбатан тенг муносабат сақланади, бирортасига ортиқча эътибор берилмайди.
- Меҳмон ёки мижоз банд бўлган ходимни кутиб турган бўлса, унга қулай кутиш шароити (ўтириш жойи, кутиш зонаси) таклиф этилади.
- Учрашув якунида меҳмон ёки мижозни эшиккача ёхуд лифт ёнигача кузатиб қўйиш яхши хулқ-атвор намунаси ҳисобланади.
- Меҳмонга бирор нарса (масалан, ичимлик) таклиф этилганда, бу самимий хоҳиш асосида, мажбурий тус олмайдиган тарзда амалга оширилади.
- Бошқа ташкилот ёки мижоз томонидан уюштирилган учрашув, тадбир ёхуд таклифга, олдиндан келишилмаган ҳолда, қўшимча ҳамкасблар ёки меҳмонларни бирга олиб бориш тавсия этилмайди.
- Бошқа ташкилотга ташриф буюрилганда, у ердаги тартиб-интизом ва жараёнга нисбатан ўзини мезбон каби тутиб, кўрсатма бериш ёки ички тартибга аралаштириш тавсия этилмайди. Меҳмон мезбоннинг тизимини ҳурмат қилади.
- Бошқа ташкилот ёки шахсга ташриф буюрилганда талабчан оҳангда сўров билдирмаслик, фақат ҳақиқатан зарур нарсаларни сўраш лозим; айниқса учрашув якунланаётганда кутилмаган қўшимча сўров билдириш тавсия этилмайди.
- Бошқа ташкилотга ташриф буюрилганда махсус эҳтиёжлар (вақт чегараси, овқатланиш бўйича чекловлар, қулайлик масалалари) ва ташриф давомийлиги ҳақида олдиндан хабар берилади. Бу икки томон учун ҳам ноқулайликнинг олдини олади.

- Меҳмон учун ортиқча тантанали ёки сунъий тайёргарлик қилиш зарур эмас; мавжуд имкониятлар доирасида самарали хизмат кўрсатиш етарли ҳисобланади. Бу компаниянинг тежамкорлик ва самарадорлик тамойилига ҳам мувофиқ келади.

4. ЙИҒИЛИШ ВА УЧРАШУВЛАР ОДОБИ

- Йиғилишга белгиланган вақтда келиш керак; кечроқ келганлар давом этаётган муҳокамани бузмасдан, жимгина бўш жойга ўтиришлари лозим.
- Муҳокама якунланмаган бўлса, раислик қилувчининг розилигисиз залдан чиқиб кетиш тавсия этилмайди (шошилинч ҳолатлар бундан мустасно).
- Бирор ишга банд ҳамкасбни кутиб турган пайтда бу ҳолатнинг сезилиб қолиши унга ноқулайлик туғдиради. Шунинг учун хотиржам ва ноқулайлик яратмайдиган тарзда кутиш лозим. Агар масала шошилинч бўлиб, дарров ҳал қилиниши зарур бўлса, бундай ҳолатда банд ҳамкасбдан қисқа вақт ажратишга рухсат сўралади.
- Йиғилишда муҳокама қилинган масала ва маълумотлар, агар алоҳида кўрсатилмаган бўлса, хизмат сирини ташкил этади ва йиғилиш доирасидан четга чиқарилмайди. Бироқ, агар муҳокама қилинаётган масала бирор кишининг ёки компаниянинг қонуний манфаатларига зарар етказишга қаратилган ҳаракат ёхуд режа билан боғлиқ бўлса, бу ҳақда тегишли раҳбариятга хабар бериш мажбурий ҳисобланади.
- Йиғилиш давомида телефоннинг овоз режими ўчирилади; шахсий кўнғироққа жавоб бериш зарур бўлса, хонадан чиқиб гаплашиш тавсия этилади.
- Йиғилишда бошқа ходимнинг сўзини бўлиш ёки бир мавзу тугамасдан бошқасига ўтиш тавсия этилмайди.
- Йиғилиш ёки залга кириб, у ерда ҳозир бўлган барча иштирокчилар билан навбатма-навбат қўл бериб кўришиш тавсия этилмайди. Бу йиғилиш жараёнини тўхтатади; фақат бевосита кўришиш мақсад қилинган шахс билан қўл бериб сўрашиш кифоя, қолганларга оғзаки салом берилади.
- Бирор киши билан учрашишга борганда, салом бериш ёки кўринадиган жойда ўтириш орқали келганингизни билдириш лозим; яширин ёки кўринмайдиган жойда ўтириб қолиш тавсия этилмайди. Чунки, бу бошқа кишининг шахсий суҳбатини билмасдан эшитиб қолишга олиб келиши мумкин. Агар шундай ҳолат тасодифан юзага келса, дарров бу жойни тарк этиш керак.
- Ҳамкасблар ўртасидаги суҳбатдан бошқа ходимлар ёки компанияга зарар етказиш ниятидаги маълумотларни компания манфаатларини ҳимоя қилиш мақсадида компания раҳбариятига хабар бериш лозим.
- Бирор ҳамкасб олдида бирор ишни ҳал қилиш мақсадида борганда, унинг ишига ҳалал берадиган ёки уни ноқулай аҳволга соладиган даражада узоқ қолиб кетмаслик керак.
- Йиғилиш ёки суҳбат жараёнида ўтириш жойи танланганда қуйидагилар инобатга олинади: суҳбатдошга ноқулайлик туғдирмайдиган масофада ўтириш; ишлаётган кишига узоқ тикилиб ўтирмаслик; бўш жой мавжуд бўлганда, бошқа кишига орқа билан ўтирмаслик.

5. СУҲБАТ ВА МУНОСАБАТ МАДАНИЯТИ

- Фикр аниқ, тушунарли ва изчил баён қилинади; яширин маъноли гаплар ва ноаниқ имо-ишоралардан қочиш лозим.
- Сўралган маълумот тўлиқ ва бир маромда берилади. Қисман ёки тушунарсиз жавоб ҳамкасбни қайта-қайта сўрашга мажбур қилади.
- Ҳазил-мутойиба бошқаларни хафа қилмайдиган тарзда бўлиши керак; кесатиш (сарказм) ва истехзодан сақланиш лозим.
- Ғийбат, мишмиш тарқатиш ва ҳамкасблар ҳақида салбий фикр юритиш мумкин эмас.
- Уч ёки ундан ортиқ киши суҳбатлашаётганда, иштирокчилардан бирортаси тушунмайдиган тилда ёки бошқалардан яшириб паст товуш билан гаплашиш ноўя ҳисобланади.
- Хато содир этилганда уни рад этиш ёки баҳона топишдан кўра, очиқ тан олиш ва тузатиш йўлини таклиф қилиш маъқул.
- Ҳамкасбларга, шу жумладан кичик лавозимдаги ходимларга нисбатан ҳурматли муурожаат шакллари (исм-шариф ёки касбий унвон) қўлланилади.
- Бир кишининг олдида бир фикр, бошқа киши олдида унга қарама-қарши фикр билдириш (икки юзламачилик) тавсия этилмайди. Фикр ким билан гаплашилаётганидан қатъи назар бир хил бўлиши керак.
- Шахсий манфаатни кўзлаб хушомад қилиш одобга мувофиқ эмас.
- Бирор ходимни фақат гумон асосида, аниқ далилсиз айблаш мумкин эмас; гумон асосида фақат ўзини ёки компания манфаатларини эҳтиёткорлик билан ҳимоя қилиш мумкин.
- Танқид ёки фикр-мулоҳаза билдирилганда, ҳақиқат қаттиқ эмас, юмшоқ ва ҳурматли оҳангда айтилади.
- Суҳбатдош ҳақиқатни қабул қилишга тайёр эмаслиги аниқ бўлса, баҳсни давом эттириш ёки уни мажбурлашга уриниш тавсия этилмайди. Бундай ҳолатда мулоқотни хотиржамлик билан якунлаш маъқул.
- Бошқа ходим ҳақида ғийбат қилинаётганини билиб туриб, қасддан тинглашда давом этиш ғийбат қилишга тенг ҳисобланади; аввало бу суҳбатни тўхтатиш керак, тўхтатиш имкони бўлмаганда бундай суҳбатдан четлашиш зарур.
- Гапириш услуби тингловчининг билим ва тажриба даражасига мослаштирилади. Мутахассис бўлмаган ҳамкасбга техник масала соддалаштирилган тарзда тушунтирилади.
- Илтимос ёки сўров олдин билдирилган бўлса ҳам, уни такрорлашда тўлиқ баён қилиш керак; “олдин айтгандим” деб қисқартириб қўйиш суҳбатдошни чалкаштириши мумкин.
- Ходимга хафа қиладиган ёки унинг камчилигини таъкидлайдиган лақаб қўйиш мумкин эмас.
- Банд бўлган ҳамкасбнинг вақтини кераксиз суҳбат билан чўзиш тавсия этилмайди.

- Бирор ходим раҳбар ёки ҳамкасб ҳақида шахсий норозилик тарзида салбий гапирганини унга етказиш тавсия этилмайди. Бироқ, бу қоида қонунбузарлик, коррупция ёки манфаатлар тўқнашуви ҳақидаги маълумотга тааллуқли эмас.
- Тахмин ёки гумонни аниқ далил сифатида тақдим қилмаслик керак. Агар маълумот тахминга асосланган бўлса, бу очиқ айтилади (масалан, “эҳтимол, у банддир”); агар аниқ маълумот йўқ бўлса, “билмайман, аниқлаб, кейин хабар бераман” дейиш тўғрироқ. Чунки, тахминни аниқ хабар сифатида айтиш нотўғри маълумотга ва ноқулай вазиятга олиб келиши мумкин.
- Амалий саволга амалий жавоб бериш лозим. Масалан, муддат ёки режа ҳақида аниқ савол қўйилса, “Сиз нима десангиз шу” дейиш нопрофессионаллик ҳисобланади.
- Норасмий, яқин танишлик даражасида бўлмаган ҳамкасб билан суҳбатда унинг оилавий аҳволи, маош ёки шахсий мол-мулки ҳақида сўраш тавсия этилмайди. Бу шахсий чегарага ҳурмат масаласи ҳисобланади.

6. ТИНГЛАШ ВА ВАЗИФАЛАРНИ ҚАБУЛ ҚИЛИШ ОДОБИ

- Суҳбатдош эътибор билан тингланади, бошқа ишга чалғимаслик лозим.
- Чақирилганда ёки мурожаат қилинганда (шу жумладан хабар ёки чат орқали) имкон қадар тезроқ жавоб қайтарилади. Жим қолиш ноаниқлик ва ортиқча кутишга сабаб бўлади.
- Вазифа ёки топшириқ берилганда розилик ёхуд рад этиш аниқ билдирилади; жимлик розилик сифатида қабул қилинмаслиги мумкин, шунинг учун жавоб аниқ ифода этилади.
- Топшириқ бажарилгач, бу ҳақда хабар берилади. Раҳбар ёки топшириқ берувчини натижани сўраб ўтиришга мажбур қилмаслик керак.
- Суҳбатдошнинг гапида бирор қисм тушунарсиз бўлса ёки шубҳа қолса, бу ҳақда дарров аниқлаштириш сўралади; ўз тахмини асосида хулоса чиқариб, шунга кўра ҳаракат қилиш тавсия этилмайди.
- Сиз учун фойдали маълумот берилаётганда ёки саволингизга жавоб берилаётганда, бефарқлик билан тинглаш тавсия этилмайди. Бу суҳбатдошни хафа қилади. Савол эшитилгандан кейин жим қолиш ёки жавобни кечиктириш ҳурматсизлик ва ноқулайлик келтиради.
- Тақдимот, маъруза ёки бирор кишининг расмий гапи давом этаётганда бошқа суҳбатга киришиш тавсия этилмайди. Бу эътиборсизлик белгиси ҳисобланади.

7. ЭЛЕКТРОН ВА ЁЗМА МУЛОҚОТ ОДОБИ

- Хат ёки хабарнинг мавзуси аниқ кўрсатилади (масалан, электрон хатнинг “Мавзу” қаторида), мазмун қисқа ва тушунарли тарзда ёзилади.
- Бир хатда бир нечта турли мавзунини аралаштириш тавсия этилмайди; бир нечта масала бўлса, улар рақамланган бандлар орқали алоҳида-алоҳида баён қилинади.

- Олдинги ёзишмага ишора қилинганда, қабул қилувчини эски хатни қайта қидиришга мажбур қилмаслик учун зарур контекст қисқача такрорланади.
- Бошқа ходимнинг шахсий электрон почтаси, хабарлари ёки иш столидаги ҳужжатларини унинг розилигисиз кўриш ёки ўқиш мумкин эмас.
- Компания ресурслари (электрон почта, бланк, техника, алоқа воситалари) фақат хизмат мақсадларида ишлатилади.
- Хабар юборишдан олдин уни қайта ўқиб чиқиш, қабул қилувчининг вақти ва ҳис-туйғуларини ҳисобга олиш тавсия этилади; кескин ёки эмоционал ҳолатда хат ёзишдан сақланиш лозим.
- Оғзаки ёки бевосита айтилиши мумкин бўлган масалани сабабсиз узун ёзишмага айлантириш тавсия этилмайди.
- Бир мавзу юзасидан ёзма (хат, чат) ва оғзаки мулоқотдан бирваракайига, тартибсиз фойдаланиш тавсия этилмайди. Агар икки усулдан фойдаланиш зарур бўлса, аввал қайси усул орқали маълумот берилгани, кейин қайси усулда давом этилаётгани аниқ кетма-кетликда кўрсатилади.

8. КАТТА-КИЧИКЛИК ОДОБИ

- Кичик лавозимдаги ходим раҳбарга ёки тажрибали ҳамкасбга мурожаат қилишда воситачисиз, бевосита мурожаат қилиши тавсия этилади.
- Раҳбар томонидан берилган топшириқ бажарилгач, бу ҳақда дарров хабар берилади.
- Раҳбар ёки тажрибали ходим кичик лавозимдаги ходимга нисбатан сабр-тоқатли бўлиши, хато такрорланганда аввал юмшоқ эслатма билан чегараланиши, фақат зарур бўлгандагина қаттиқроқ чора кўриши тавсия этилади.
- Раҳбар хато қилган тақдирда, бу ҳақида кичик лавозимдаги ходимдан узр сўрашдан тортинмаслиги керак. Бу раҳбарнинг обрўсини туширмайди, аксинча мустаҳкамлайди.
- Кичик лавозимдаги ходим асосли фикр ёки эътироз билдирганда, раҳбар буни хотиржамлик билан қабул қилади, фақат лавозим фарқига асосланиб рад этмайди.
- Жамоадаги бирор ходимга ёки ёрдамчига ортиқча имтиёз бериш бошқаларда нохолислик туйғусини уйғотиши мумкин. Бундан сақланиш керак.
- Кичик лавозимдаги ходимларнинг фикри ва тажрибаси ҳам қадрланади; уларни менсимаслик ёки фикрини инкор этиш тавсия этилмайди.
- Раҳбар ёки тажрибали ҳамкасб билан биргаликда ишлаётганда (масалан, биргаликдаги лойиҳа ёки топшириқда), унинг розилигисиз мустақил равишда янги қадам ёки ҳаракатни бошлаб юбормаслик лозим. Аввал хабардор қилиш ёки маслаҳатлашиш тавсия этилади.
- Раҳбар ёки тажрибали ҳамкасбнинг лавозимидан фойдаланиб, ундан шахсий хизмат талаб қилиш (масалан, шахсий ишларни бажартириш) тавсия этилмайди.

- Ҳурмат фақат ташқи кўриниш ёки расмий хизмат намоиши билан эмас, асл ҳамкорлик ва кўрсатмаларга риоя қилиш билан ифодаланади; сунъий, фақат кўз-кўз қилиш учун қилинган ҳурмат белгилари қадрсиз ҳисобланади.
- Раҳбарга нисбатан ҳурмат кўрсатишда, бу бошқаларга ортиқча ноқулайлик ёки юк туғдирмайдиган тарзда амалга оширилади.
- Кичик лавозимдаги ходимлар раҳбардан ўзига нисбатан расмий унвон билан мурожаат қилинишини талаб қилмаслиги, оддий, самимий мурожаатдан мамнун бўлиши тавсия этилади.
- Бир нечта раҳбар ёки катта лавозимдаги шахс билан ишлашда, уларнинг нисбий ваколат даражаси ҳисобга олинади; бевосита раҳбарнинг кўрсатмаси билан бошқа бўлим раҳбарининг кўрсатмаси зид келганда, қайси бирига устунлик берилиши олдиндан аниқ бўлиши керак.
- Раҳбар турли темперамент, тажриба ва қарашдаги ходимлар билан ишлайди; ҳаммасини бирдан, бир хил қолипга солиш мумкин эмас. Ҳар бир ходимга индивидуал ёндашув талаб этилади.
- Агар раҳбар бирор ходимнинг мажбурий бўлмаган (хизмат доирасидан ташқари) топшириқни бажармаслигини олдиндан билса ёки сезса, бундай топшириқни барибир бериш тавсия этилмайди.
- Агар кичик лавозимдаги ходим сўралмаган ҳолда раҳбарга ёрдам кўрсатса ёки эътибор белгиси кўрсатса, раҳбар буни ходимга ортиқча юк бўлиб қолишига йўл қўймаслиги, ортиқча харажат ёки кучга мажбур қилмаслиги керак.
- Агар ҳамкасбнинг ҳурматсиз муносабати раҳбарни жиддий норозиликка келтирса, бу ҳолатда жаҳл устида тўғридан-тўғри гаплашиш ўрнига, вазиятни бироз кейинга қолдириш ёки хотиржам, маданий мулоқот қила олган бошқа шахс орқали масалани ҳал қилиш маъқул.

9. ХИЗМАТ КЎРСАТУВЧИ ХОДИМЛАРГА МУНОСАБАТ

- Фаррош, ҳайдовчи, кўриқчи, ошпаз каби техник ва хизмат кўрсатувчи ходимларга нисбатан бошқа ҳамкасблар билан бир хил даражада ҳурмат кўрсатилади.
- Уларга топшириқ берилганда ёки бирор иш илтимос қилинганда аниқ ва тушунарли тарзда баён қилинади; топшириқ бажарилгач, миннатдорчилик билдириш яхши одат ҳисобланади.
- Бошқа бўлим ёки раҳбарга бўйсунувчи ходимдан хизмат талаб қилишдан олдин, унинг бевосита раҳбаридан розилик олиш одобга мувофиқ.
- Хизмат кўрсатувчи ходимнинг хизмати фақат ўзаро ҳурмат ва ҳақиқий эҳтиёж асосида сўралади; бунинг учун унга ноқулай шарт-шароит яратилмайди.
- Ёрдам ёки хизмат сўралганда, бажарувчининг лавозими ёки мавқеидан қатъи назар, унга ҳурмат билан мурожаат қилинади.

- Агар бирор ҳамкасбнинг сўровини бажариш имконияти бўлмаса, лекин бошқа ходим ёрдам бера олса, сўровчини ўша ходимга йўналтириш мумкин ва тавсия этилади. Бироқ бундан олдин, бу йўналтириш иккинчи ходимга ноқулайлик туғдирмаслигини аниқлаш лозим.

10. СОВҒА ВА ЭЪТИБОР БЕЛГИЛАРИ ОДОБИ

- Ҳамкасблар ва мижозлар ўртасида кичик эътибор белгилари (туғилган кун совғаси, байрам табриги) самимийлик асосида берилади ва бирор сўров ёки хизматга бевосита боғлиқ бўлмаслиги керак.
- Совға қабул қилувчини қийин аҳволга солувчи қиймат ёки шаклда бўлмаслиги керак.
- Совға имкон қадар хусусий тарзда, ошкоралик ёки намоиш қилиш мақсадисиз тақдим этилади.
- Совғанинг нархини сўраш ёки уни жамоат олдида баҳолаш одобга мувофиқ эмас.
- Мижоз ёки ҳамкордан олинган совғалар бўйича компаниянинг Одоб-ахлоқ қоидаларида белгиланган тартибга риоя қилинади; шубҳали ёки мажбурлаш тусини олган совғалар қабул қилинмасдан, бу ҳақда раҳбарга маълум қилиниши тавсия этилади.
- Совға қандайдир сабабга кўра рад этилса, рад этиш сабабини ҳурмат билан сўраш мумкин, лекин бунини ўша заҳоти қаттиқ талаб қилиш тавсия этилмайди.
- Олинган совғани унутиб қолдириш ёки эътиборсиз қолдириш тавсия этилмайди; шу билан бирга, олинган совғаларнинг қиймати ёки сонини бошқалар олдида мақтаниб гапириш ҳам одобга мувофиқ эмас.

11. ТАВСИЯ ВА ТУШУНТИРИШ СЎРАШ ОДОБИ

- Бирор кишини (номзод, етказиб берувчи, шерик ёки ҳамкорни) тавсия қилишда, бу тавсия қарор қабул қилувчи томонга лавозим ёки мавқе орқали билвосита босим ўтказмаслиги керак.
- Тавсия беришдан олдин тегишли факт ва маълумотлар аниқланади; тўлиқ аниқлик ҳосил қилинмасдан туриб тавсия берилмайди.
- Тавсия бу маслаҳат тури бўлиб, мажбурий кўрсатма ҳисобланмайди; шунинг учун тавсия рад этилса, бу қарор қабул қилувчининг ҳуқуқи ҳисобланади. Бундан хафа бўлиш ёки бунини эслаб юриш тавсия этилмайди.
- Раҳбар ёки юқори лавозимдаги ходим қариндош, таниш ёки ҳамкорни ишга қабул қилиш, харид-тендер ғолибини танлаш ёхуд топшириқ беришда устунлик бериш бўйича тавсия қилаётганда, бу белгиланган манфаатлар тўқнашуви ва коррупцияга қарши сиёсат доирасида баҳоланади.
- Амалий масала (масалан, ҳуқуқий ёки молиявий хулоса) юзасидан савол бирданига бир нечта ваколатли манбага (масалан, юридик бўлим ва комплаенс хизмати) алоҳида-алоҳида, расмий равишда хабардор қилмасдан йўналтирилмайди. Бу турли жавоблар олиб, улардан “қулайроғини” танлаш хавфини туғдиради.

- Агар олинган расмий жавобга шубҳа ёки норозилик бўлса, бу масала тегишли тартибда (масалан, юқори даражага мурожаат орқали) ҳал қилинади; яширин равишда бошқа манбага мурожаат қилинмайди.
- Расмий сўров аниқ ва тушунарли тилда ёзилади; мавзуга алоқаси йўқ ортиқча маълумотлар киритилмайди. Сўровчининг исм-шарифи ва бўлими аниқ кўрсатилади; бир нечта савол бўлса, улар рақамланади ва сўровнинг нусхаси сақланади.
- Бир манбадан олинган расмий жавоб ёки хулоса бошқа шахсга етказилганда, унинг мазмуни ўзгартирилмасдан, аслига мувофиқ тарзда баён қилинади. Оғзаки етказишда маъно бузилиши тушунмовчиликка олиб келиши мумкин.
- Расмий хулоса ёки тушунтиришни ҳамкасблар орасидаги шахсий низо ёхуд баҳсда бошқа кишини “ютиш” воситаси сифатида ишлатиш тавсия этилмайди. Бу зиддиятни кескинлаштиради.

12. ОЧИҚ ОФИС МУҲИТИДА ИШЛАШ ОДОБИ

- Умумий фойдаланишдаги буюм ва жиҳозлар (принтер, проектор, мажлис хонаси ускунаси ва бошқалар) ишлатилгандан сўнг ўз ўрнига қайтарилади.
- Бошқа ходимнинг иш столи, мониторидаги маълумотлар, ҳужжатлари ёки шахсий буюмларидан унинг розилигисиз фойдаланиш ёки уларга назар солиш мумкин эмас. Бунга ваколатли бўлган алоҳида ҳодимнинг хизмат вазифаси юзасидан амалга ошириладиган чора тадбирлар мустасно.
- Қарзга ёки вақтинча олинган буюм ишлатилгач, сўралмасдан, ўз вақтида қайтарилади.
- Умумий ўтиш йўллари ва дам олиш зоналари шахсий буюмлар билан тўсилмайди.
- Очiq офис муҳитида овоз баландлигини назорат қилиш зарур. Телефон суҳбати, мусиқа ёки баланд овозда гаплашиш атрофдагиларнинг ишига халал бермаслиги керак.
- Узоқ давом этадиган шахсий телефон суҳбатлари учун алоҳида хона ёки умумий жойдан четроқ масканга чиқиш тавсия этилади.
- Ҳар бир ходим учун белгиланган иш жойи ва буюмлар тартиби сақланади; бошқа ходимнинг столи ёки шкафидан рухсатсиз фойдаланилмайди.

13. ОШХОНА ВА ДАМ ОЛИШ ХОНАСИ ОДОБИ

- Ошхона ёки дам олиш хонасида овқатланишда кучли ёки ўткир ҳид тарқатувчи таомлардан имкон қадар сақланиш тавсия этилади. Бу атрофдаги ҳамкасбларга ноқулайлик туғдирмаслиги учун муҳим.
- Идиш-товоқ ва ускуналар (микротўлқинли печь, чойнак, музлаткич) фойдаланилгандан сўнг тозаланиб, ўз ўрнига қайтарилади.
- Шахсий озиқ-овқат маҳсулотлари умумий музлаткичда сақланганда, эгасининг исми билан ажратиб қўйилади; бошқа ходимнинг озиқ-овқатидан унинг розилигисиз фойдаланиш мумкин эмас.

- Овқатланиш жараёнида атрофдагиларни хижолатга соладиган ёки иштаҳани қочирадиган мавзуларни муҳокама қилиш тавсия этилмайди.
- Стол ва ўтириш жойлари овқатлангандан сўнг тозаланади; қолдиқ ва чиқиндилар ўз идишига ташланади.
- Умумий стол ёки ошхонада чекланган миқдордаги озиқ-овқат (масалан, байрам тортлари, ширинликлар) бўлишилганда, ҳар бир ходим ўз улушини ҳисобга олиб, ортиқча олмаслиги тавсия этилади.
- Умумий лаганда турган ширинлик, мева ёки шунга ўхшаш маҳсулотдан бир вақтнинг ўзида биттадан олиш тавсия этилади.
- Бошқа ҳамкасблар ҳали овқатланишда давом этаётган бўлса-да, сабабли равишда эртaroқ туриб кетиш зарур бўлса, бу жим тарк этилмасдан, қисқача узр билан билдирилади.
- Умумий ошхонада сақланадиган озиқ-овқат маҳсулотлари ёпиқ ҳолда сақланади; очиқ қолдирилган озиқ-овқат гигиена нуктаи назаридан ноқулай ҳисобланади.

14. ВАЪДА ВА МУДДАТЛАРГА РИОЯ ҚИЛИШ

- Берилган ваъда ёки белгиланган муддатдаги иш бажарилади; холис сабабларсиз ундан бош тортиш мумкин эмас.
- Бажариш имконияти аниқ бўлмаган ҳолатда шошилиш ваъда бериш тавсия этилмайди.
- Муддатни бажариш имконсиз бўлиб қолса, бу ҳақда олдиндан, имкон қадар тезроқ тегишли шахсга хабар берилади.
- Ишга кеч қолиш ҳолатлари Ички меҳнат тартиби қоидаларида белгиланган тартибда ҳисобга олинади.

15. МУШКУЛ ВАЗИЯТЛАРДАГИ ҲАМКАСБГА МУНОСАБАТ

- Юқумли ёки атрофдагиларга ноқулайлик туғдирувчи касаллик билан оғриган ходим, иложи борича, бошқа ҳамкасблардан четроқ туриши (масалан, масофадан ишлаш ёки алоҳида хонада ишлаш) тавсия этилади.
- Касал ёки мусибатга учраган ҳамкасбга мурожаат қилинганда, унда умидсизлик уйғотадиган гаплардан сақланиш, аксинча кўнгил кўтарувчи сўзлар айтиш лозим.
- Касал ёки мусибатга учраган ҳамкасбга ташриф буюрилганда узоқ қолиб кетмаслик, касаллик ёхуд мусибат тафсилотлари ҳақида ортиқча сўроқ қилмаслик тавсия этилади.
- Ҳамдардлик билдиришда ҳолатни ортиқча бўрттирмаслик ёки ҳаяжонли иборалар ишлатиш тавсия этилмайди. Аксинча, хотиржам ва қўллаб-қувватловчи оҳангда муносабат билдирилади.
- Касал ёки мусибатга учраган ҳамкасбга барча ҳамкасблар шахсан ташриф буюриши шарт эмас; яқин ҳамкасблар буни табиий равишда амалга оширади, бошқалар эса қисқа хабар ёки эътибор билдириши орқали ҳамдардлик кўрсатиши мумкин. Буни мажбурий тус олдирмаслик керак.

16. ЯКУНИЙ ҚОИДАЛАР

- Мазкур Йўриқнома “АБС” АЖ Одоб-ахлоқ қоидаларига амалий илова сифатида ишлаб чиқилган бўлиб, унинг ажралмас қисми ҳисобланади.
- Йўриқнома Ходимлар билан ишлаш бўлими томонидан барча ходимларга тарқатилади ва янги ходимлар ишга қабул қилинганда таништирилади.
- Йўриқнома турли бўлим вакилларида иборат ишчи гуруҳ томонидан муҳокама қилиниб, зарур ҳолатларда янгиланиши мумкин.

Киритилди:

Сана: _____

Ходимлар билан ишлаш бўлими бошлиғи

Келишилган:

Бошқарув раиси ўринбосари

Юрисконсульт

Таҳлил ва методология хизмати бошлиғи
